

671.1237
078
14

東光縣志

東光縣志卷四 光緒十二年重修

學校志

學校爲教育英才之地而其所以勵品敦行克端士習者莫切於臥碑八條故特敬謹首列之俾知儒者所重在此且易遵循也若書院社學皆由此可推矣至於

文廟之祀位祭儀樂章佾舞則天下郡邑自有專記之書在茲可無濫及第著其要領志學校

欽頒臥碑文

順治九年

朝廷建立學校選取生員免其丁糧厚以廩膳設學院學

道學官以教之各衙門官以禮相待全要養成賢才以供

朝廷之用諸生皆當上報

國恩下立人品所有教條開列於後

一生員之家父母賢智者子當受教父母愚魯或有非
爲者子旣讀書明理當再三懇告使父母不陷於危
亡

一生員立志當學爲忠臣清官書史所載忠清事跡務
須互相講究凡利國愛民之事更宜留心

一生員居心忠厚正直讀書方有實用出仕必作良吏

若心術邪刻讀書必無成就爲官必取禍患行害人
之事者往往自殺其身常宜思省

一生員不可干求官長結交勢要希圖進身若果心善
德全上天知之必加以福

一生員當愛身忍性凡有司官衙門不可輕入卽有切
己之事只許家人代告不許干與他人詞訟他人亦
不許牽連生員作證

一爲學當尊敬先生若講說皆須誠心聽受如有未明
從容再問毋妄行辨難爲師亦當盡心教訓勿致怠
惰

一軍民一切利病不許書生上書陳言如有一言建白以違制論黜革治罪

一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

學宮

謹按朱子綱目唐貞觀十一年定律令云舊制釋奠於太學以周公爲先聖孔子配饗元齡等以孔子爲先聖顏回配饗此誠學宮之肇始及開元二十七年復援北齊高洋之誅追謚孔子爲文宣王被王者之服釋奠用官懸贈弟子爲公侯伯而天下州縣遂皆

有學宮矣至宋景定間又以天壇之櫺星門亦仿置於聖廟而以尊天者尊聖禮至隆已迨乎明嘉靖中改稱至聖先師更去像而易主遂爲定制今因之

學宮

在縣治西明洪武二年典史李從道建七年併

入阜城十四年復置邑令祝仲英重建永樂四年邑令羅榮重修正統七年提學御史程富欲倡重修邑人郭友諒出金任其事有記景泰二年主簿崔興成化十四年邑令陳廉宏治三年邑令崔騰五年邑令張英十三年邑令師禮俱重修萬歷二十八年邑令余良弼重修四十二年邑令俞思冲教諭沙涑重修

天啟三年邑令楊應震重修未竣五年邑令王良相
續修有記崇正間邑令邵建偉教諭李本實等重修
國朝順治八年教諭卜昌運訓導于鳴鳳重修康熙十年
邑令王九鼎教諭宋可繼重修有疏乾隆二十四年
邑令張堯重修有記道光二十年邑令張夢麟重修
有記

舊志大殿五楹額曰大成殿左右爲兩廡各七間南
爲戟門門外左右爲名宦鄉賢祠南爲泮池又南爲
櫺星門門外東西舊有木坊二座一曰德配天地一
曰道冠古今後圯邑令白爲璣建下馬牌二於此南

爲屏牆牆南有坊匾曰治化本原後易曰騰蛟起鳳
後易面南曰義路禮門面北曰景聖思賢東坊一座
面東曰聖域面西曰金聲玉振西坊一座面西曰賢
關面東曰江漢秋陽後圯正坊之南數十武復有坊
在西大街舊曰儒林後易曰桂林又易南面曰大成
北面曰斯文在茲後圯今

大成殿五楹殿後

崇聖祠三間

舊名啟聖祠

殿前東西廡各七間又前戟門三

間門前爲泮池左名宦祠右鄉賢祠各三間名宦祠
南爲齋房三間再前爲櫺星門左忠義祠右節孝祠

又左右二坊左坊外曰聖域內曰德配天地右坊外曰賢關內曰道冠古今又南爲照壁外爲外泮池

吉水劉儼撰重修文廟碑記東光畿甸近地也邑有夫子廟卑隘弗稱且傾頽特甚正統七年秋監察御史程公以提學事至顧瞻而歎曰是豈所以欽聖靈哉我之責也乃謀諸邑與學之僚衆曰今欲不官費民勞而就是役其計焉出僉曰邑有鉅姓郭氏子友諒富而好禮嘗捐粟濟饑恩旌義民委之當爲不辭明日請友諒友諒欣然聽命無難色其弟友才友德友敬子曰允曰坦咸樂從乃捐已資市眞材鳩良工撤其舊而新之數月而落成焉未幾監察御史丁公以未備聖像商諸邑民馬仲昇高伯通趙子恭庠生李學王春等亦復欣然應命逾月而像成望諸外宮闕金碧之輝爛如也謁於內黼黻圭璋之儀儼如也眞不啻觀聖賢於闕里低徊而不能去明年程公書其事首末來請予記予惟聖人之道如天然由之者惟見其君臣父子兄弟夫婦朋友之各安其倫邦國朝廟

鄉黨家庭之各致其理有不知爲之者非若浮屠
老子之可以禍福動人故能使人創其廬飾其像
以徼福今聖人以如天之道而能使友諒輩捐重
資勞大費出於中心之誠若此是又見聖人天地
之化不期於動人而誠之至者自不能不動也况
任風紀有如程丁二公以興起斯文爲己任者乎
役之成也宜哉程公名富字好禮甯國涇縣人丁
公名清字本澄浙之歸安人時贊其謀者知縣錢
鐸縣丞蒲青典史華昱相其成者教諭武茂訓導
尹旻耿純蓋多知所先務云正統八年邑人王
元爽撰重修文廟碑記吾邑學宮建於太祖高皇
帝之二年維時草昧甫闢締造維艱而廟貌宮牆
卑隘弗稱厥後督學使者兩擴而兩大之載在邑
志頻年以來疏於修繕而壞於紛更者非一日已
邑侯宏農楊公以青縣令移宰吾邑蒞學之日目
擊頽壞慨然就多士而言曰學校儲才之地治化
之原也予辱茲邑長實躬政教學頽敎湮厥咎在
予舍是弗理區區簿書期會奚爲也於是銳意更
始首捐奉金十鍰諏吉興事自是廣文簿尉闔邑
搢紳以及多士各輸貲恐後出納有稽興作有

程閱數月而煥然更新闕宮之頌曰新廟作而萬民若侯之謂矣夫以數年曠事而舉以一朝且財不費而民不擾宏才遠識見義勇爲侯其賢乎祠東魯王侯又以靜海令移宰吾邑下車數月惠政多端而加意學宮一如楊侯前美藉以彰焉告竣之日屬予爲記是役也經始於癸亥六月朔日落成於甲子三月二十日學諭張先生司訓谷先生李先生營度其間日夕罔懈而又分命青衿之長孫繩武解生經旨等以董其事余嘗謂人傑則地靈今兩侯接踵振起斯文而三先生相與共肩厥事日有講月有課論文校藝寒暄弗輟多士幸生斯世秋風桂馥春雨杏花將有不可勝記者詩曰豈弟君子遐不作人賢侯之明德遠哉楊侯諱應震陝西癸卯科鄉進士華州華陰人王侯諱良相山東己酉科鄉進士濟南府濟陽人先是谷先生擢高邑諭而後之者爲清豐王先生其來也暮未與興作而端方樂易表帥多士裕如也例得並書天啟五年邑令王九鼎撰重修文廟疏安陵居京畿之南考縣志治西有先師廟爲明直指程公重修而前尹楊公繼之年遠時遷不免荒蕪

皇上御極之九年鼎受命來牧茲土展謁
廡下瓦礫雜杳木敝榱崩滿地荒涼不堪目覩謀
之廣文宋君曰諺有之些小不補直至尺五及今
修之雖費猶省耳宋君曰善甚盛舉也夫廟祀之
設所輔學以成士者也凡我同人孰不由是路出
入是門哉而漠然坐視其廢胡可也遂告諸薦紳
士耆同發願力共勦厥事俾撤朽剝蝕植頽築虛
廟貌煥然頓遠舊觀至程能經費計曰獎勵是又
在乎董是役者 滄州戴明說撰重修文廟碑記
郡縣之有學由來尚矣世之盛也多禮樂中和之
儒及其衰而忠孝節廉之事不絕於史冊非其陶
泳於聖教者深歟今知觀津縣事策庵王公諱九
鼎三秦名宿師古好學下車後卽以修理興學爲
先務廣文宋君諱可繼克勦厥事凡薦紳鄉先生
及邑弟子員踴躍捐貲於是廢者合之缺者補之
風雨鳥鼠剝蝕者望之丹之落成之日屬予爲記
曰公鯁鯁然惟恐不及者皆今日有司所絕不暇
計者也世輕公之所重公重世之所輕異日人文
蔚起盛德大業皆出其中而龐眉壽考之老戴維
垂纓之彥聽鄉樂之歌飲獻酬之酒周覽學舍誦

公懿嫩相與尸而祝之教思無斁何異畏壘庚桑
乎蓬萊清淺斯石宛在余亦有榮施焉康熙十一
年郡守達明撰重修文廟碑記己卯冬十有二
月余以部員恭膺簡命知河間府事庚辰
春正月接晤府屬諸公諮詢十一城風土因革當
聞之署東光縣令張名珪者敬道邑治文廟自
康熙王子前縣王令名九鼎重修後至乾隆癸酉
歷八十餘年又經前陳令名新燕與邑孝廉李名
若龍謀更新之倡勸紳士捐資約千緡鳩工庀材
正在踴躍不意踰年陳令奄逝後來者相與因循
殿及兩廡並崇聖祠僅存規模焉毅然自請竟陳
令未竟之志余聞起而謂之曰文廟爲朝廷
崇儒重道之地教化所由推爾之請可謂端政治
之大本矣第予其請而五日京兆方以難竟爲慮
乃是年四月上旬甘霖普沛余周歷勸農至東光
叩謁至聖大成殿兩廡崇聖祠雕楹刻桷澤
紛施硃牆壁整立是前之剝落頽敗者今竟煥然
更新有令人豁然神爽者叩其費之所出蓋自捐
奉倡修崇聖祠敬一亭院牆並西大牆於擇吉舉
事時諸紳士聞風激動盡將前此登簿未出之資

欣然駢集不惟可竟陳令未竟之功抑且旁及明
倫堂同時拆建自此得展隆重先師之禮有功於
學校豈淺鮮哉今五月望日告成請記於余特具
始末勒石以誌不朽云乾隆二十五年邑令張
夢麟撰重修文廟碑記東光之有至聖先師
廟舊矣我朝承有明舊制其先後修之者爲前
尹王公九鼎陳公新燕張公奎自乾隆庚辰重葺
後迄今八十載將就傾圯戊戌秋夢麟移宰是邑
祇謁廟堂退而商之廣文崔君光第程君玉綸少
尉侯君士鋒捐俸爲之倡邑之士民咸欣然樂從
輸金以助董事者爲前仁壽令李君峻聲等九人
鳩工庀材經始於庚子二月某日越九月告竣由
是自大成殿而外月臺兩廡泮池戟門櫺星門以
至禮門義路翼宮各坊內而崇聖祠明倫堂旁及
於名宦鄉賢兩祠莫不整飭其舊而更新之觀瞻
於是始肅也且夫庠序之設與賢育才之地也我
國家崇儒重道凡山陬海澨罔不爭自濯磨仰
副聖天子壽考作人之雅化矧屬在畿輔
近光倍切者乎今日者觀於殿廡之壯麗穹宏則
知學之貴進於高明光大也觀於門牆之嚴邃肅

穆則知學之貴協於平正方直也觀於泮池之濼
繞淳淵則知學之貴求於旁通曲達也學校興而
人文蔚起實於斯有厚望焉夢麟既與邑之士民
樂觀厥成又嘉李君峻聲等之勇於爲善也爰撫
其本末書諸石
道光二十年

明倫堂 舊志在啟聖祠東正堂三楹前左爲進德齋
書案房右爲修業齋祭器庫已圯前爲儀門又前爲
大門俱康熙七年教諭宋可繼重建今

正堂三楹前有儀門又前爲大門門外爲外泮池南
爲黌宮坊與明倫堂遙對

名宦祠 在戟門東三間祀古今十五人
祠舊在明倫堂後康熙十

四年邑人馬光捐資移此有記

明東光縣知縣祝公仲英

東光縣知縣曹公謙

國朝直隸巡撫于清端公成龍

字北溟山西永甯人

直隸巡撫文清公格爾古德

直隸巡撫于襄勤公成龍

直隸巡撫趙公宏燮

直隸總督朱勤愍公昌祚

直隸總督李公蔭祖

吏部侍郎張公麟

刑部尙書史公致嚴

大理寺卿王公榕吉

刑部侍郎吳公廷棟

東光縣知縣孫公震

交河縣知縣署東光縣知縣嚴公會業

東光縣知縣白公爲璣

鄉賢祠 在戟門西三間祀古今十二人

祠舊在明倫堂後康熙十

四年邑人馬光捐資移此有記

唐南陽郡王袁貞烈公恕己

宋觀文殿大學士劉忠肅公摯

處士張公預